

## **ESPAZIO PUBLIKOA ARAUTZEKO ORDENANTZA**

### **ZIOEN ADIERAZPENA**

Ordenantza honen xedea da partikularrek espazio publikoa erabiltzeko gutxieneko baldintza batzuk finkatzea: orain arte ez da egon gaiari buruzko udal araudirik eta, hartara, Ordenantza honek ahalbidetuko du udalerriko talde guztien eskaerak eta beharrianak aintzat hartu, eta espazio publikoaren erabilera antolatzea.

Horrela, bada, zenbait kontu biltzen ditu Espazio Publikoa Arautzeko Ordenantzak: bide publikoan eta bere instalazioetan egindako obrek bete beharreko baldintzak zehazten ditu; bide publikoan merkataritza-jarduerari lotuta jartzen diren elementuak arautzen ditu; espazio publikoaren erabilera okerrak definitzen ditu; bide publikoan ekitaldiak antolatzeko edo udal instalazioak erabiltzeko gutxieneko baldintzak jasotzen ditu; eta merkataritza-jardueretan zein aparkalekuetan aparkatzeko debekua jasotzen duten plakak emateko baldintzak definitzen ditu.

Udal Ordenantza hau idazterakoan aintzat hartu dira hiri-ingurunean larrialdi-egoeretan irisgarritasunari eta segurtasunari buruz finkatutako irizpide nagusiak (indarreko araudiak ezarritakoak). Zehazkiago, kontuan hartu da hiri-inguruneen, espazio publikoen, eraikinen eta informazio eta komunikazio sistemen irisgarritasun baldintzei buruzko arau teknikoak onartzen dituen apirilaren 11ko 68/2000 Dekretua.

## **I. KAPITULUA – XEDAPEN OROKORRAK**

### **1. artikulua – Xedea**

Ordenantza honen xedea da arautzea espazio publikoan eman daitezkeen jarduerak, jar daitezkeen instalazioak edota egin daitezkeen okupazioak, eta horiek bateratzea erabilera komun edo orokorrekin.

Era berean, udal instalazioak (karpa, agertokiak, instalazio osagarriak, eta abar) erreserban hartu eta erabiltzeko irizpide orokorrak finkatzen ditu testuak.

### **2. artikulua – Aplikazio-eremua**

Ordenantza hau aplikatuko zaie erabilera publikoko eremu guztiei, titularrak edozein izanda ere. «Erabilera publikoko»ko izaera zehaztuko dute eremuaren kokapenak edota indarreko planeamenduak.

Beste administrazio publikoek kudeatutako erabilera publikoko ondasunak erabiltzerakoan ere, Ordenantza honetan xedatutakoari men egingo zaio.

Interes orokorreko ekitaldiak antolatzeko (interes soziala, kulturala edo antzekoak), egoki irizitako Ordenantzaren atalak eten ahalko ditu Udalak, aldi batez.

Ordenantza honen aplikazio-eremutik at egongo dira ostalaritza-establezimenduen terrazak, horiek badute-eta berezko ordenantza.

Udal mugarte barruko kaleko salmenta ere, berariazko ordenantza bidez arautua egongo da.

### **3. artikulua – Izaera juridikoa**

Bide publikoaren okupazioek eta aprobetxamenduek erabilera komun bereziaren izaera juridikoa dute; jabetza-eskubidearen salbuespen gisa ematen dira, hirugarrenen eskubideen kalterik gabe; eta aurretiazko udal baimena behar dute, zeina Ordenantza honetan xedatutakoaren arabera emango baita.

Baimenok, gainera, prekarioan emanda daudela joko da, eta errebotatu ahalko dira, interes publikoko arrazoiak tarteko, kalte-ordainik jasotzeko eskubiderik gabe. Partikularrak ez dauka baimena eskuratzeko berezko eskubiderik: diskrezionalki emango zaio. Hori bai: ebazpenak, edozein izanda ere, behar bezala arrazoitua egon beharko du.

Bide publikoaren okupazio eta aprobetxamenduak eten ahalko dira aldi batez. Hala egin behar izanez gero, elementu guztiak kendu beharko dira bertatik. Udalak halako eteteak agindu ditzake berak sustatzen, baimentzen edo interes orokorreko zat jotzen dituen jaiak edota ekitaldi kulturalak, ekitaldi zibikoak edo kirol-ekitaldiak daudenean.

Ez zaie bide publikoaren okupaziorako edo aprobetxamendurako baimenik emango pertsona fisiko edo juridikoei, baldin eta exekuzio-prozeduraren edo premiamenduzko bidearen bitartez eska daitezkeen zorrak badituzte Udalarekin.

## **II. KAPITULUA – BIDE PUBLIKOAN OBRAK EGITEA ETA HORIEK SEINALEZTATZEA**

### **4. artikulua – Baimendutako elementuak**

Kapitulu honetan zehazten dira, batetik, bide publikoan egin beharreko obrek bete beharreko baldintzak (izan obra publikoak ala pribatuak); eta bestetik, bide publikoan eragina duten obren instalazio osagarriek bete beharrekoak (aldi baterako hesiek; aldamiok; karga-jasogailuek; babes-hegalek; siloek; edukiontziek; materialak biltzeko eremuek; obra-etxolek; eta antzekoek).

### **5. artikulua – Baldintza orokorrak**

Bide publikoan egin beharreko obrak, edota bide publikoan eragina duten behin-behineko obra-instalazio osagarriak, behar bezala seinaleztatu eta babestu beharko dira, pertsonen segurtasun fisikoa bermatua egon dadin, eta oinezkoen joan-etorriak ahalik eta erraztenak eta erosoak izan daitezzen.

Obrek oinezkoen ibilbideei eragiten dietenean, 1,50 m-ko gutxieneko iraganbidea bermatu beharko da. Espaloia zabalagoa bada, haren zabalaren adinakoa izan

beharko da iraganbidea ere. Bestalde, oinezkoen joan-etorriak ugariak diren tokietan, 1,50 m-ko zabalera aski ez bada, iraganbidea zabalagoa izatea xedatu ahalko da. Edozelan ere, ezin bada ezarritako gehienezko zabalera bermatu, ordezkoko ibilbidea egokitu beharko da.

Libre utzi beharko dira ureztatze-ahoak, suteen aurkako ur-hartuneak eta kutxatilen erregistroak, dagozkien zerbitzu publikoek erabili behar badituzte.

Hiri-altzarien kokapena ere errespetatu beharko da. Hala ere, hiri-altzariren bat lekuz aldatzea beharrezkoa balitz, hori egiteko aukera aztertuko da, interesdunak aurretiaz eskaera eginda. Hiri-altzarien edozein lekualdatze interesdunaren kontura izango da, eta udal langileek egingo dute.

Zangak, laginketak, materialak biltzeko guneak edota makineriarako eremuak eta antzekoak, hesi iraunkor eta etengabeen bidez babestuko dira; hesiok ez dute ertz bizirik izango, ez dira irristatuko, eta iraulketarekiko erresistentzia izango dute. Babestu beharreko eremuaren inguru osoan zehar jarriko dira aipatutako hesiak. 50 cm gorde beharko dira, gutxienez, perimetroan kanpoen dagoen tokitik. Ezingo da hesien ordezkorik, sarerik, xingolarik edo antzekorik jarri.

Obrarako elementu osagarriak jartzerakoan, kontuan hartu behar da trabarik ez egitea ibilgailuen ikusgarritasunari —bereziki, bidegurutzeetan eta garajeen irteeretan—.

Bide edo eremu publikoetan horrelako elementuak jartzeko, xedatu ahalko da aurretiaz berme-gordailua eratzea, eremu publikoan sor litezkeen kalteak konpontzeko.

Auzokoei zarata ahalik eta gutxien pairatu dezaten, premiazko edota ezinbesteko kasuetan salbu, obrak astelehenetik ostiralera egin beharko dira (jaiegunak kanpo), 08:00ak eta 19:00ak bitartean. Zarata handien eragiten duten lanak (eraistek, zulatzeak, eta abar), 09:00etatik aurrera egin beharko dira.

## **6. artikulua – Laginketak eta zangak bide publikoan**

Ezingo da laginketarik edo zangarik utzi zabalik asteburuetan, edota jaiegun bi edo gehiagotan zehar; zuloa hormigoiz estali beharko da, gutxienez, eta aglomeratu edo zoladura jartzeko prest utzi beharko da.

Oinezkoen joan-etorriak errazteko metalezko xaflen ertzei dagokienez, berriz, espaloia baino 2 cm altuagoak izan daitezke, gehienez ere.

Kutxatilen ertzak babestuta egon behar dira, edota lurrera lotutako egurrezko zein metalezko xaflekin estalita egon behar dute. Bestalde, ezin da obra-hondakinik inon ere pilatu.

Zoladuran laginketak edo zangak egin ostean, lanak hasi aurretik zeunden bezalaxe utzi beharko da.

## **7. artikulua – Aldamioak, babes-hegalak eta/edo karga-jasogailuak**

Aldamioaren oinarrian egurrezko takoak jarri beharko dira (aldamioak zuzenean zoladuran eutsi ez daitezten).

2,20 m-tik beherako osagaiekin txarrantxatutako aldamio-zatiak behar bezala seinalezatu eta babestuko dira, lurreraino, ibilbide osoan zehar, ikusmen-arazoak dituztenei irisgarritasuna errazteko.

Karga-jasogailuei dagokienez, itxitura egin beharko zaie inguru osoan, eta, obrako laneguna amaitzen denean, ondo itxita geratu beharko da itxitura hori.

## **8. artikulua – Plataforma jasotzaileak eta obrak bide publikoan**

Lanak eta makineria dauden eremua behar bezala babestu beharko da. Horretarako, lan-eremua hesiekin mugatuko da, langileak ez direnak inguruan egon edo ibili ez daitezten.

Oinezkoen iraganbideetan, edota oinezkoen ibilbidea aldatu ezin daitekeen lekuetan (atarietako, dendetarako eta abarrerako sarbideetan), babes-hegala jarri beharko da, bide publikora ezer erori ez dadin.

## **9. artikulua – Obra-hondakinetarako edukiontziak eta zakuak**

Zoladura ez hondatzeko, berariaz debekatzen da obra-hondakinetarako edukiontziak espaloi gainean edota oinezkoen eremuetan jartzea: asfaltatutako aparkalekuetan kokatu beharko dira.

Zoladura hondatuko ez duten zakuak, berriz, oinezkoen eremuetan jarri ahal izango dira, baldin eta, jarri eta gero, oinezkoen joan-etorriak oztopatzen ez badituzte eta, gutxienez, oztoporik gabeko 2,00 m-ko iraganbidea uzten badute.

Edukiontziak eta zakuak botatakoa kontrolatuko da, horien sakonera gainditu ez dezan.

Edukiontziak eta zakuak bide publikotik kendu beharko dira honako kasu hauetan:

- Baimenaren epea agortzen denean.
- Beteta egon bezain laster (hustu ditzaten).
- Ostiraleko 18:00etatik asteleheneko 08:00etara bitartean. Ostirala edo aurreko egunak, zein astelehena edo osteko egunak jaiegunak badira, epe hori luzatu egingo da hasierako edo amaierako lehen egun baliodunera.

Edukiontzia edo zakua bide publikotik kendu eta gero, tokia garbi utzi beharko da.

Edukiontziak txukun eta garbi egongo dira.

## **10. artikulua – Obra-etxolak, siloak, materialak biltzeko guneak eta antzekoak**

Aipatutako guztiak oinezkoen ibilbideetatik at kokatuko dira —ahal dela, aparkalekuetan—.

Dena delako elementu osagarria bide publikotik kendu eta gero, tokia garbi utzi beharko da.

### **III. KAPITULUA – MERKATARITZA-JARDUERETARA LOTUTAKO ELEMENTUAK**

#### **11. artikulua – Baldintzak**

Bide publikoan merkataritza-jardueretara lotutako elementuak jartzeko baimena emango da (publizitate-kartelak; produktuak, ikusgai; haurrentzako jolas-makinak; salmenta automatikoko makina txikiak; bankuak; eta abar), baldin eta oinezkoen joan-etorriei traba egiten ez badiete: 2,00 m-ko iraganbidea bermatu beharko da, gutxienez, trafikoa edo arkupeak dituzten kaleetako espaloietan; eta 3,50 m-koa, berriz, oinezkoen kaleetan.

Aipatutako elementuak espazio publikoan egon ahalko dira 10:00etatik 22:00etara bitartean. Ordutegi horretatik kanpo, bide publikotik kendu beharko dira egunero-egunero, eta lokal barruan gorde.

Dendek ezin dituzte bozgorailuak edo musika jarri bide publikora begira, ez bada Udalak aurretiaz baimendutako ekitaldiak ospatuko dituztela.

### **IV. KAPITULUA – ESPAZIO PUBLIKOA OKER ERABILTZEA**

#### **12. artikulua – Espazio publikoa oker erabiltzea**

Debekatuta dago espazio publikoa eta bere elementuak oker erabiltzea, hau da, gainerakoek espazio publiko hori erabil dezatela ekin edo zailtzen duten jarduerak egitea.

Debekatuta daude espazio publikoaren eta bere elementuen erabilera oker hauek:

- Bide eta espazio publikoetan kanpatzea, hau da, espazio publikoetan edota bertan dauden elementu zein altzarietan kanpin-dendak, ibilgailuak, autokarabanak edo karabanak puntualki edo modu iraunkorrean jartzea. Salbuespena: toki zehatzetarako emandako baimenak.
- Aipatutako eremuetan lo egitea, egunez zein gauez.
- Banku eta eserleku publikoak berezkoa dutena ez den beste xede batzuetarako erabiltzea.
- Norbanako edo taldeek espazio publikoa erabiltzea —espazio publiko horren berezko xedea aintzat hartu gabe—, eta gainerakoek ezin erabiltzea, hau da, erabilera pribatiboa, ezohikoa, higinenearen edota gizalegearen aurkakoa egitea. Bereziki, espazio publikoa oker erabiltzen ari dela joko da, norbanako batek edo batzuek espazio publiko horren zati bat maiztasun batekin zein jarraian, eta modu trinkoan erabiltzen badute eta, ondorioz, gainerako herritarrek zati hori erabiltzeko aukerarik ez badute.
- Iturrietan, urmaeletan edo antzekoetan arropa garbitzea.
- Espazio publikoan kozinatzea. Salbuespenak: herriko jaietan, udal-jardueretan edota Udalak diruz lagundutako jardueretan horretarako egokitutako tokietan kozinatzea; edota kozinatzeko berariazko udal baimena izatea.

### **V. KAPITULUA – EKITALDIK BIDE PUBLIKOAN**

### **13. artikulua – Aplikazio-eremua**

Aurretiazko baimena eskatu beharko da bide publikoan izaera pribatuko ekitaldiak egiteko, eta kapitulu honetan xedatutakoa bete beharko da.

Kalean musikari, arteari, publizitateari lotutako jarduerak, informazio jarduerak, diru-billetak edo antzekoak egiteko, baldin eta bide publikoan instalaziorik jarri behar ez bada (standak, karpak, agertokiak, megafonia, eta abar), ez da behar aurretiazko udal baimenik.

### **14. artikulua.– Baldintza orokorrak**

Bide publikoan edozein ekitaldi egiteko baimen-eskaera, ekitaldiaren data baino bi aste lehenago eskatu beharko da, gutxienez.

Ekitaldia antolatzen dutenek egiaztatu beharko dute erantzukizun zibileko aseguruia kontratatu dutela, berariaz, instalazioen egoera objektiboak edota bertan lan egiten dutenen jarduerak bertaratuei eragin ahal dizkien kalteei aurre egiteko.

Instalazioak lurrera lotuko dira, baina bide publikoko zoladura kaltetu gabe.

Karpek, etxolek eta antzeko elementuek, horiei buruzko araudiek xedatutakoa bete beharko dute.

Instalazioek, oztoporik gabeko 2,00 m-ko iraganbidea, gutxienez, bermatu beharko diete oinezkoei, trafikoa edo arkupeak dituzten kaleetako espaloietan; eta 3,50 m-koa, berriz, oinezkoen kaleetan. Era berean, libre utzi beharko dituzte ureztatze-ahoak, suteen aurkako ur-hartuneak eta kutxatilen erregistroak, dagozkien zerbitzu publikoek erabili behar badituzte.

instalatuko diren elementuak berriak edo ia berriak izango dira, eta behar besteko segurtasun- eta estetika-baldintzak beteko dituzte.

Gainera, une oro bermatu beharko da erabiltzeko segurtasunaren eta suteen aurkako segurtasunaren eremuko indarreko legeria betetzen dela.

Bide publikoan janaria prestatu eta saltzen dutenek, berriz, Basauriko Udaleko Osasun Atalak finkatutako irizpideak bete beharko dituzte.

Oro har, ezingo dira erabili energia sorgailuak. Horrelakoak erabiltzeko baimena ematen den kasuetan, herritarrei edota oinezkoei enbarazu egingo ez dieten toki batean kokatuko dira, eta elkarbizitza ez asalatzeko moduko zarata-maila zainduko dute.

Dena delako ekitaldia amaitzean, instalazioak guztiz desmuntatu, eta eramua garbitu beharko da.

Ekitaldia antolatzen dutenek, bestalde, autobabeserako plana eduki beharko dute, hala xedatzen baitu zenbait jarduerak, zentrok edo establezimenduk larrialdiei aurre egiteko dituzten autobabes betebeharrak arautzen dituen azaroaren 2ko 277/2010 Dekretuak.

### **15. artikulua – Ordutegia**

Oro har, bide publikoan egitekoak diren ekitaldiak ezingo dira 10:00ak baino lehenago hasi, eta 22:00ak baino lehenago amaitu beharko dira. Ostiraletan eta jaiegunen bezperetan, ordubetez luzatu ahalko da denbora-tarte hori.

Ekitaldia amaitu, eta ordubete izango dute antolatzaileek egiturak desmuntatu, jaso eta eremua garbitzeko.

## **16. artikulua – Udal karpa eta bestelako udal azpiegiturak erabiltzeko baldintzak**

Oro har, Basauri udalerrian erroldatutako elkarteei baino ez zaie utziko karpa, agertokiak eta instalazio osagarriak erabiltzen. Udalerritik kanpoko elkarteei baimena emateko, berriz, beharrezkoa izango da dagokion udal batzordearen aurretiazko onespena eta, betiere, baimen hori interes orokorrerako edota herritarren onurarako denean baino ez da emango.

Karpa edota beste edozein udal egitura erabiltzeko, eskabidea aurkeztu beharko da, gutxienez, ekitaldia baino hilabete lehenago.

Datak esleitzeko, eskabideen jasotze-dataren hurrenkerari jarraituko zaio, zorrotz-zorrotz.

Oro har, karpa kenduta egongo da ekain bukaeratik irailaren erdialdera arte. Beraz, denbora-tarte horretan ez da ekitaldirik baimenduko karpan.

Bestalde, 10:00etatik 22:00etara erabili ahal izango da karpa, eta ostiral eta jaiegunen bezperan, ordubetez luzatu ahal izango da ordutegi hori. Ekitaldia amaitu, eta ordubete izango dute antolatzaileek egiturak desmuntatu, jaso eta eremua garbitzeko.

Udalaren berariazko baimena salbu, debekatuta egongo da karpa barruan janaria eta edaria saltzea.

Ekitaldia amaitutakoan, barrualdea jaso eta garbitu beharko da, eta ekitaldia egin aurretik zegoen bezalaxe utzi.

Karpan jarriko diren karteletan, berriz, aintzat hartu beharko da hizkuntza-normalizazioari buruzko udal araudia; gainera, zaindu beharko da hizkuntza sexista eta biolentoa ez izatea, eta osasun-ohitura txarrak ez sustatzea.

Era berean, udal karpan egingo diren ekitaldiek, Ordenantza honetako 14. artikuluko aplikagarri zaizkien baldintzak bete beharko dituzte.

## **VI. KAPITULUA – APARKATZEA DEBEKATZEKO PLAKAK**

### **17. artikulua – Pasabideak eta aparkaleku-erreserbak**

Ibilgailuen zaindegi jarduerak aparkatzea debekatzen duten plakak eskuratu ahal izango dituzte udal-mugarte osoan. Hala xedatzen du eraikuntzetan aparkatzea arautzen duen indarreko Ordenantzak.

Gainerako jardueri, berriz, aparkatzea debekatzeko plakak dagozkie, bakar-bakarrik, hiri-lurzoru industrialean kokatuta badaude. Hala eta guztiz ere, Udal Zerbitzu Teknikoen aurretiazko txostenarekin, aparkatzeko debekua jasotzen duten plakak jarri ahalko dira bizitegi-guneetan edota bestelako jardueretan ere, aparkaleku publikoko plazarik kentzen ez badute, eta kaleko trafikoa eragozten ez badute.

Pasabidea ahalbidetzen duen jarduera behar bezala legeztatua egon behar da, eta irekitze- zein jarduera-lizentzia eduki behar du (edo, bestela, jarduera hasteko aurretiazko jakinarazpena aurkeztuta izan behar du).

Oro har, udal mugarte osoan ez da jarduera pribatuetarako aparkalekurik gordeko bide publikoan.

## **VII. TITULUA – BAIMENAK IZAPIDETZEA**

### **18. artikulua – Obretarako behin-behineko instalazioak**

Bide publikoan obretarako elementu osagarriak jartzeko eskabideak egin daitezke, lizentzia-eskaerarekin edo obren jakinarazpenarekin batera, ala bereiz.

Aldamioak, babes-hegalak, karga-jasogailuak, obretarako etxolak, siloak, materialak biltzeko eremuak, plataforma jasotzaileak eta antzekoak bide publikoan jartzeko, instalazioa deskribatzen duen txostena (memoria eta planoak) erantsi beharko da. Txosten hori teknikari eskudunak sinatuta egon beharko da, eta zehaztu beharko du dena delako elementuek zein eremu hartuko duten.

### **19. artikulua – Merkataritza-jardueretara lotutako elementuak**

Bide publikoan merkataritza-jardueretara lotutako elementuak jartzeko (publizitate-kartelak, ikusgai jarri nahi diren produktuak, haurrentzako jolas-makinak, salmenta automatikoko makina txikiak, bankuak eta antzekoak), eskabidea aurkeztu beharko da eta, bertan, honako hauek jaso beharko dira:

- Jarri beharreko elementuaren deskribapena.
- Elementua jarri nahi den guneko oinplanoaren krokisa, eta zein merkataritza-lokali lotuta dagoen.
- Argazkia.

### **20. artikulua – Bide publikoan ekitaldia egitea**

Bide publikoan izaera pribatuko ekitaldia egiteko, baimen-eskaera aurkeztu beharko da, zeinak honako hauek jasoko baititu:

- Ekitaldiaren deskribapen xehatua.
- Erakunde antolatzailearen ordezkariaren datuak, eta harremanetarako telefono-zenbakia.
- Ekitaldia non egingo den —kokapen-plano eta guzti—.
- Ekitaldia hasteko eta amaitzeko aurreikusitako ordutegia.



- Behin-behineko instalazioak (karpak, agertokia, megafonia, eta abar).
- Bertaratuei eragin ahal zaizkien kalteei aurre egiteko erantzukizun zibileko aseguruia, Ordenantza honetako 14. artikulua xedatutakoaren arabera.
- Elikagaien manipulaziale txartela (elikagaiak prestatu edo salduko badira).

Ekitaldian udal karpa edota beste edozein udal azpiegitura erabili behar izanez gero, horretarako eskabidea ere aurkeztu beharko da.

## **21. artikulua – Aparkatzea debekatzeko plakak**

Jarduera baten sarbidean aparkatzea debekatzen duten plakak jartzeko baimena lortzeko, eskabidea aurkeztu beharko da, honako hauekin batera:

- Jardueraren kokapen zehatza.
- Jardueraren titularra.
- Ibilgailu kopurua (jarduera ibilgailuen zaintzari badagokio).
- Lokalerako sarbidearen argazkia.

## **VIII. TITULUA – ARAU-HAUSTEAK ETA ZEHAPENAK**

### **22. artikulua – Instalazioak baimenik gabe jartzea**

1.- Udal agintaritzak, kautela-neurri gisa, berehala kendu ahal izango du bide publikoan baimenik gabe jarritako edozein elementu, dagozkion zehapenak ezartzeko aukeraren kalterik gabe.

2.- Jabetza edo erabilera publikoko lurzorua halako instalazioekin okupatzen bada dagokion baimenik gabe, arduradunari indarreko ordenamendu juridikoan aurreikusitako zehapenak ezarri ahalko zaizkio, aurretiaz dagokion zehapen-espeditentia izapidetuta. Aurreko guztia gorabehera, erabilera publikoko lurzorua okupatu izanagatiko tasak ordaindu beharko dira.

### **23. artikulua – Baimenean jasotako baldintzak ez betetzea**

Ordenantza honetan edota emandako baimenean jasotako baldintzak bete ezean, indarreko legeriak aurreikusitako zehapen ekonomikoa ezarriko da, aurretiaz dagokion zehapen-espeditentia izapidetuta. Horrez gain, baimena baliogabetu egin ahalko da, eta instalazioa berehala kenduarazi, baldin eta Udalak egindako errekerimendua desobeditzen bada.

### **24. artikulua – Arau-hausteen sailkapena**

Ordenantza honetan jasotako arau-haustek izango dira arinak, astunak eta oso astunak.

1.- Falta arinak dira:

- a) Ordenantza honek agindutako ezaugarri teknikoak betetzen ez dituzten elementuak edo instalazioak jartzea bide publikoan.
- b) Elementuak baimendutako kokapenetik kanpo jartzea.
- c) Finkatutako ordutegia ez betetzea.
- d) Instalazioa txukun eta garbi ez mantentzea.
- e) Hiri-altzariak hondatzea.
- f) Udal-baimena ez erakustea.
- g) Espazio publikoaren erabilera desegokiak (12. artikulua).
- h) Hizkuntza-normalizazioa betetzen ez duten, edota hizkuntza sexista, biolentoa, edota osasun-ohitura txarrak sustatzen dituen hizkuntza darabilten kartelak jartzea udal karpan.
- i) Ordenantza honetan ezarritako baldintzak ez betetzea, ez-betetze hori falta astuntzat edo oso astuntzat jotzen ez denean.

2.- Falta astunak dira:

- a) Bide publikoan elementuak jartzea baimenik gabe.
- b) Udal ikuskatzaileek eta agintariak egindako errekerimenduei desobeditzea.
- c) Azken 12 hilabeteetan hiru falta arin egin izana.

3.- Falta oso astunak dira:

- a) Errespetu faltak: udal ikuskatzaileak eta agintariak iraintzea, samintzea edo mehatxatzea.
- b) Elementuak aldi baterako ez kentzea —jai edota ekitaldi kultural, zibiko edo kirol-ekitaldien kasuetan—.
- c) Azken 12 hilabeteetan hiru falta astun egin izana.

## **25. artikulua – Zehapenak**

Ordenantza honen aurkako arau-hausteak, honako eskala honen arabera zigortuko dira:

- Falta arinak: 500,00 eurorainoko isuna.
- Falta astunak: 500,01 eta 1.000,00 euro arteko isunak.
- Falta oso astunak: 1.000,01 euro eta 2.000,00 euro arteko isunak, eta baimena baliogabetzeko aukera.

Zehapenak ezartzeko orduan, ondoko hauei begiratuko zaie: erruduntasun-graduari; egindako faltaren garrantziari; arau-hausteak dakarren arriskuari; berrerortzeari edo berriro egiteari; eta bestelako inguruabar astungarri edo aringarriei.

## **26. artikulua. – Zehapen-prozedura**

Azaroaren 26ko Herri Administrazioen Araubide Juridikoari eta Administrazio Prozedura Erkideari buruzko 30/1992 Legeak araututako zehapen-prozedurari buruzko printzipioei egokituko zaie titulu honetan araututako zehapen guztietarako prozedura.

Azaroaren 26ko Herri Administrazioen Araubide Juridikoari eta Administrazio Prozedura Erkideari buruzko 30/1992 Legeak, eta Euskal Autonomia Erkidegoko Herri Administrazioen Zigorrezko Ahalmenari buruzko otsailaren 20ko 2/1998 Legeak araututako zehapen-ahalmenari buruzko printzipioei egokituko zaie Ordenantza honetan araututako zehapen guztietarako prozedura.

## **AZKEN XEDAPENAK**

### **Ordenantza indarrean sartzea**

Ordenantza hau indarrean sartuko da bere behin betiko onespena Bizkaiko Aldizkari Ofizialean argitaratzen den dataren biharamunean.